

Wednesday, April 9, 2025

Time - 2:30pm - 2:35pm

REGIONAL NEWS BULLETIN

(MIDDAY)

UNION MoS VISITS SIAHA

Union Minister of State for Home Affairs Pu Nityanand Rai chuan Prime Minister Pu Narendra Modi kaihhruai sawrkarin Hmarchhak State a ngaipawimawh tih sawiin hmarchhak state hmasawn nan hnathawh tam tak hmachhawp an nei tih a sawi.

He thu hi vawiina Siaha District a tlawhna ah sawiin Union Minister Pu Nityanand Rai chuan Siaha District chu Ram dang nena ramri nei a nih avangin a venhim kawngah mipui tawiawmna a pawimawh hle a ti a, National Education Policy 2020 hnuaiah pianpui tawng a zirlaiten an zir theih chu NEP 2020 thil tum pawimawh tak pakhat a ni tih sawiin Hindi tawng chawisan tumna nilovin Ram chhunga tawng chi hrang hrang awm te chawisan nana duan a ni tih a sawi.

Union Minister chuan Citizenship Amendment chungchang sawiin ram chhunga Sakhaw dang vuantute nekchepna a ni lo a ti a, Ram thenawm leh ram danga Sakhuana avanga tihduhdah tuarte tan zalen taka an chen theih nan leh India ram chu Sakhaw hrang hrang vuantuten zalen taka an awm theih nana duan a ni tih a sawi bawk.

Union Minister hi Pu Devesh Kumar, Bihar MLA leh Mizoram State BJP President Pu Vanlalhmuaka bakah sawrkar mi pawimawh ten anlo dawngsawng a,. Vawiin vek khan Lawngtlai lam panin an chhuak leh nghal a ni.



NATIONAL TRIBAL YOUTH FESTIVAL

Ministry of Tribal Affairs leh Directorate of Social Welfare, Women & Child Development Department hmalaknaa buatsaih National Tribal Youth Festival chu State Tribal Resource Centre, Kelsih-ah neih mek a ni a, vawiin a ni hnihna hi Social Welfare Minister Pi Lalrinpuii'n khuallian niin a hmanpui ang.

Ni 4 awh Festival hi Chief Secretary Pu Khilli Ram Meena chuan nimin khan a hawng a, he festival chhung hian thenawm state atangin zai leh lam thiam tam tak an lokal a, festival chhim tur hian mipuite a hmunah kal theih niin kal na tur Bus a thlawnin sawrkarin a ruahman a ni.

He festival chhung hian rimawi leh hnam lam chi hrang hrang bakah Food Court, exhibition te nen hun hlimawm tak hman theih tura buatsaih a ni a, he hunah hian Nagaland atangin Imnainla Jamir, Manipur atangin Vawngchawi Vaiphei leh zaithiam hrang hrang an inlan dawn a, Naktip April ni 11 bik hi Naupang te pual bika hun buatsaih niin Department chuan he hun chhim tur hian mi zawng zawng an sawm a ni.



POSHAN PAKWADA

POSHAN Pakhwada 2025 puala Plastic hmang lo tura inzirtirna chu vawiin khan I&PR Auditorium, Treasury Square, Aizawl-ah hman a ni.

Mizoram Pollution Control Board leh Directorate of Women & Child Development buatsaih, Workshop on Elimination of Single Use Plastics-ah hian Women & Child Development Joint Director, Pi Zonunpari Sailo chuan zirlai naupang kalkhawmte hmaah vawiina hun an hman chhan Say No to Single Use Plastic' tih thupui sawiin, nitina hman khat daih plastic hman thin chu tangkai viau in lang mah se khawvel ti chhetu leh ti tawptu a ni a ti a, Kalkhawmte chu hman khat daih plastic hman thin titawp tura danglamna thlentu leh zirtirtu an ni thei tih sawiin, nitin khawsakna ah plastic chu hnawl a, hman reng theih thila thlakin khawvel leh a chhunga chengte tan ram nuam leh tha zawk an din thei tih a sawi a, Mizoten chhiatni that ni-a plastic um leh no hmanga tui an chhawp thin chu tih tlem tul a tih thu a sawi bawk.

Pi Zonunpari chuan POSHAN Pakhwada (Nutrition Fortnight) leh Mission Saksham Anganwadi & POSHAN 2.0 thil tum sawiin Mission Saksham Anganwadi leh POSHAN 2.0 te chuan naupang kum thum atanga kum ruk inkar Anganwadi Centre-a an nun bul tan nan a thiam thil pawimawh zirtir leh nu naupai, nau pawm, naupang piang tir atanga kum ruk hnuai lam leh tleirawl ten an kum mila chaw tha khamkhawp an dawn theih nan leh harsatna an tawh theih laka venhim chu an tum ber a nih thu a sawi a. Nu a rai atanga naupang kum 2 a lo tlin thleng chu naupang te thluak a than nasat lai ber niin an puitlin hnua an pian phung tur leh an hmalam huna an hlawhtlin thlenga hriltu a nih avangin enkawl na tha pek an ngaih nasat ber lai a ni a ti bawk.

Vawiina hun hmanah hian zawhna leh chhanna hmanga inkawmho niin tunhnaia India ram cycle hmanga fang chhuaktu, Pu Vanlallawmzuala Varte chuan kalkhawm te chu plastice hmang lo tura intiamna a neihpui bawk.



RABIES OUTBREAK

Tunlaia Manipur Churachandpur-a 'Ui a' hrileng chungchangah Aizawl DC Pu Lalhriatpuia chuan thuchhuah siamin ui vulh tute fimkhur lehzual an ui enkawl tur ui a hri danna, Rabies vaccine laktir vek tur a nih thu an sawi.

Aizawl DC chuan, tun hnaia Manipur Churachandpur-a ui a hrileng avangin Ui vulhtute chu Ui a hri danna pe ngei turin a chah a, khawlaiah zalen takin ui vah tir lo tur leh khawlaia an chhuahpui dawn anih chuan kai zel turin a ti a, an zun leh ek hnutchhiah lo turi leh midang tana harsatna siam lovin an vulh tur ani a ti a, thenawm state Manipur atangin Ui lakluh khap anih bakah ui khuahkhirh lohin mihring a she chuan dan hmangin thla ruk lungin tan emaw cheng sang 5 thleng chawi theih ani a ti bawk.

Churanchandpur a Ui a hrileng avang hian tun hnai ah Ui a hri danna Rabies vaccine la, Vety Hospital Khatla ah an pun phah nasa hle a, vawiin ah pawh AH&Vety Polyclinic Hospital ah Ui a hri danna lak tum mi engemawzat an kal a ni.

